

YAKUQ

Hun Kat é Laiká (James)

¹ Garai Gasang eq Yhumsîng Yesuq Hkrisduq é jùn, ngò Yakuq gi, byo myín tô é Israelaq raxe í myû lé, nguingón dang shit kyô kat lhê.

Lumjîng Myit Lé Chyam É Hkyô Eq Hpaqchyî Byéng-yá

² Ngá gumang wuê ê, nungmoq é lumjîng myit lé chyam wú é hui jáng, shikut shirâng sê é myit jat nyi é lé, nungmoq sê nyi lhê nghut mù, ³ wuîhke jamjau ajung jung lé htûng huê é hkûn, gàu jowò mó nghut nyi lhê nghû luî myit yù keq. ⁴ Hau htoq agó, nungmoq banshoq gúm gumjup jup dut mù luî, haî le a langhpyut shoq, shikut shirang é myit gi, yhumsîng kut nyi é muzó lé wó lhoq gumjup nyi sháng gaq. ⁵ Nungmoq má rayuq yuq hpaqchyî byéng-yá langhpyut tô é nghut le gi, haû banshoq bang lé, mara a hun é za, agùn agó byî nyi é Garai Gasâng chyáng dúng nyi sháng gaq, haû jáng, Garai gi, yhang lé byi râ nghut lhê. ⁶ Nghut kôlhang, lum shut é myit a bo é za, lumjîng é myit èq dúng nyi sháng gaq, hkâsu mù gâ le, lum shut é sù gi, laidûn èq hik luî toq lo é nhông mâ é wuîlhêng eq wuí nyi ri. ⁷ Haú yuq gi, Yhumsîng Garaî chyáng mâ é haî le wó yû râ su a ngam nyi sháng gaq. ⁸ Yhang gi, myit-kó xan sù nghut luî, yhâng é hkyô hkat hkangmó má, mù htâng a nyang é sù nghut nyi ri.

Myùng Sù Eq Wó Sù

⁹ Myung é gumang hpó gi, waq toq huê é má, wó sù gi, lhoq nyhûm huê é má, gabú gumrong nyi sháng gaq.

¹⁰ Hkâsu mù gâ le, wó sù gi, wàhu banbó su wôl byuq ló râ nghut lhê. ¹¹ Bui gi, nyé é lai eq toq lô jáng, haû wàhu nyhuî byuq ló mù, abó le yoq gyó byuq é eq, hau é yúng sâm pé gi, htên byuq é su; wó sù le haû eq rajung za, yhang kut nyi é muzó má wôl byuq ló râ nghut lhê.

Gunglaú É Hkyô

¹² Wuîhke jamjau huî le, wó shikut shirang nyi sù gi, hkungsô wó nyî ri; hkâsu mù gâ le, chyam wú é ban hui jáng, yhang gi, Garai Gasang lé chyitdap é bang lé, byî tô é danggidiq asak janmaú lé, wó yû râ nghut lhê.

¹³ Gunglaú huî é sù ó yuq nghut kôlhang, gunglaú huî é hkûn lé, "Garai Gasang, ngo lé gunglaú nyi ri." nghû luî, a taí sháng gaq, hkâsu mù gâ le, agè ashop é hkyô gi, Garai Gasang lé wó gunglaú é a nghut, ó yuq lé le Garai Gasang gunglaú râ a nghut. ¹⁴ Nghut kôlhang, ó yuq nghut le le, yhumsing é gungsho ô nau é dông, shuî lâng nghoq ló é nghut le gi, agúng alaú hui bê. ¹⁵ Gungsho ô nau é hkyô kúm gi, zogûng dut jáng, mara lé hku htoq lo ri. Mara kô dîng jáng, shi é má jé râ nghut lhê.

¹⁶ Ngò chyitdap é gumang wuî ê, i-myt hkyô nghoq hkâ-nghoq nyî kó. ¹⁷ Gè réng é eq byíng jup é chyunghuq lhunglhang gi, ahtoq shut mâ é nghut mù luî, maubó gung pê* é Yhângwa Garai chyáng mai gyó lo é nghut ri. Yhang gi, ahpuq alik atau ahû dut é buishûm su dut râ a nghut. ¹⁸ Yhang hpan tô é amyû pé má, nga-nhúng gi, sâng-hi myhíng é ashi pé dut lo sháng gaq ga, Yhang gi, Yhang ô nau é hkyô cháng luî, haû tengmán é mungdang mai, nga-nhúng lé hkû to bê nghut ri.

Gyo Yu É Eq Cháng Kut É Hkyô

* 1:17 Maubó gung pé gâ é gi, bui, kyî, lhamó lé gâ lhê.

¹⁹ Ngò chyitdap é gumang wuê ê, shí hkyô lé nungmoq sê nyi akô. Byù ó yuq nghut kôlhang, gyô yù râ lé han nyi sháng; dang tái râ lé a hân sháng gaq; nhik-yo râ lé le hkâhân kô. ²⁰ Hkâsu mù gâ le, byù nhik-yô é hkyô gi, Garai Gasang ô nau é dingmán é dông asak dui hkyô wó lhoq htoq râ a nghut. ²¹ Haû mù luî, achag achyut é banshoq eq ladu laî agè ashop é pé lé lhoq san lhoq sêng pyám luî, nungmoq é i-myt lé wó hkyi yù râ matú, i-myt unghkaû má Garai Gasang hô tô é mungdang lé, nú-nhâm é myit eq hkam yu nyi keq.

²² Nungmoq gi, yhumsing gùng lé a mhaû pyám sháng gaq, haû mungdang lé wó gyô yu é bang za a nghut, haû dông châng kut é bang le nghut nyi sháng gaq. ²³ Mungdang haû lé wó gyô yù mù, a châng kut é sù ó yuq le, yhumsing é gungdu lé myoqjâm má wú sù eq wuí ri. ²⁴ Yhang gi, yhâng é gungdu lé wú yù mù, myoqdong lhik é eq, yhumsing gungdu hkâsu dut é lé tô-myhî pyâm ri. ²⁵ Nga-nhúng lé wó lhoq lhut yu é gumjup é tarâ má, rago za wú tsuq nyi sù kúm gi, wó gyô yù mù tô-myhî pyâm é sù a nghut, muzó eq tân shit é sù nghut é yanmai, haû yuq gi, yhang châng kut é muzó má shimân jeju wó râ nghut lhê.

²⁶ Byù rayuq yuq, "Ngò gi, noqkuq htông lé lhoq dik sù nghut lhê." ga luî, myit to kôlhang, yhumsing nhut shô lé a wó hkâng mù, yhumsing myit lé mhaû pyâm é nghut le gi, haû yuq é noqkuq htông gi, akôm za nghut nyi ri. ²⁷ Íwa Garai Gasâng é hí má sansêng é eq, râ é hkyô a bo é noqkuq htông gi, wuîhke jamjau huî é chuimó chuizô pé lé, châng wú garúm é hkyô eq, mingkan htoq mâ é achag achyut é hkyô lé koi pyâm é hkyô nghut ri.

2

Myoqdong A Wó Hkyin Lhum

¹ Ngá é gumang wuê ê, hpungwup shingkang bo é nga-nhông é Yhumsing Yesuq Hkrisduq lé lumjng hkyô má, byu é myoqdong lé hkâhkyin lhum kó. ² Dangké, hng loqchyop chyop luí, réng é mebu wut é sũ rayuq eq ajeq amyha é mebu wut é asho awuê é sũ rayuq gi, nungmoq é tarajong má wang lò kô é nghut le, ³ haũ réng é mebu wut é sũ lé, nungmoq lhom wú mù je hkunggâ é èq, "Shî aróng wó é jowò má zùng aq." dum, haũ asho awuê é sũ lé nghut jáng gi, "Mhó má yap to aq." haũ su a nghut jáng, "Ngá é hkyi htâng má zùng aq." ga tái kô é nghut le gi, ⁴ nungmoq rayuq eq rayuq gamhkuí lhum luí, a ge é i-myt èq doqdân é bang dut lò bekô a nghut kó lú?

⁵ Ngò chyitdap é gumang wuê ê, gyô yù keq, lumjng hkyô má wó sùt nyi luí, gidìq tô tô é mingdân é silí wunlí lé, Yhang lé chyitdap bang wó hkam yù sháng gaq ga, Garai Gasang gi, myigùng htoq mâ é asho awuê é bang lé hkyin yù bê a nghut kó lú? ⁶ Nungmoq kúm gi, asho awuê é sũ lé a hpau a yùm kut pyám bekô nhung; wó bang sùt bang kúm gi, nungmoq lé zik zo mù luí, yhumsing é loq èq yhang, tarâ tingnyâng shut she hkyut ló bekô, a nghut kó lú? ⁷ Nungmoq eq sêng é kô dik é mying lé lhang, yhangmoq yhang rhoi dang tái bum akô, a nghut kó lú?

⁸ Haũ mù luí, Chyúmdang má, "Náng gung lé náng chyitdap é su, náng é chyangnâm mâ é bang lé le chyitdap aq." [☆] ga luí, tái tô é hkohkam tarâ lé, nungmoq tsuq za châng é nghut le gi, nungmoq ge é hkyô lé kut nyi bê. ⁹ Nghut kôlhang, byu é myoqdong lé nungmoq hkyin nyi kô é nghut le gi, nungmoq mara kut nyi gũ nghut bê yanmai, haũ tarâ lé shut é bang lé su tarâ jéyáng é huí nyi bekô râ nghut lhê. ¹⁰ Byù ó yuq nghut le le tarâ banshoq lé cháng kôlhang, haũ mâ é ralhumm lhum lé shut pyám jáng gi, tarâ banshoq lé shut pyám sũ dut byuq râ nghut lhê.

☆ 2:8 Nhong 19:18

¹¹ Hkâsu mù gâ le, "Su-myi sulàng hkâlú." ✠ ga luí, hkang tô é sù gi, "Byù lé hkâsat." ✠ ga luí le, taí tô ashî. Nàng su-myi sulàng a lú kôlhang, byù sat é sù nghut le gi, tarâ lé shut é sù nghut bê.

¹² Haû su mù luí, nungmoq lé lhoq lhut kat é tarâ đông jéyáng doqdân é hui râ bang su, ru taí nyi keq; ru châng kut nyi keq. ¹³ Hkâsu mù gâ le, shogyo myit a bò sù gi, a shogyô é đông jéyáng doqdân é hui râ nghut lê. Shogyo nhikmyîn é hkyô kúm gi, jéyáng doqdân é hkyô lé wó ông lut râ nghut lê.

Lumj́ng Myit Eq Zui Saí É Hkyô

¹⁴ Ngá gumang wuì ê, byù rayuq yuq, "Ngò gi, lumj́ng myit bo lê." ga taí nyi kôlhang, muzó a bo lom é nghut le gi, haí akyû bò râ lú? Lumj́ng myit haû gi, yhang lé wó hkyi yù râ lú? ¹⁵ Gumang, gu-nhá rayuq yuq a chîn dut nyi é eq, nyi wui é zoshuq langhpyut tô é nghut le, ¹⁶ nungmoq chyáng mâ é rayuq yuq gi, yhangmoq é gungsho má râ é hkyô haí le a byi é za, yhangmoq lé, "Nungmoq wut é gùng lúm sháng gaq, zô é ùng gyi sháng gaq, ngui ngui ngón ngón ló keq." ga taí é nghut le gi, hai akyû bò kó râ lú? ¹⁷ Haû eq rajung za, lumj́ng myit má muzó a bo é nghut le gi, shi é eq rajung za nghut nyi ri.

¹⁸ Dum rahkyô gi, "Nàng gi, lumj́ng myit bo ri, ngò gi, muzo bo lê. Muzó a bo é náng é lumj́ng myit ngo lé tân shit wú aq, haú hkûn, ngá muzó èq ngá lumj́ng myit lé, nang lé ngò tân shit râ nghut lê." ga luí, rayuq yuq taí râ nghut lê. ¹⁹ Garai Gasang rayuq za nghut é lé nàng lumj́ng ri-nhung! Nghut bê, haû gi, jô é hkyô nghut nyi ri, nat gâng pé le haû su yhang lumj́ng mù gyuq nán nyi akô nghut ri.

²⁰ Kyoq a bo é byù bam ê, lumjínj myit má muzó a bo le akôm za nghut é hkyô lé, nàng sé nau lhê a nghut lhú?

²¹ Nga-nhông é îwa Abraham gi, hkungga gyap htoq má yhangzo Isak lé shigu hkungga kut é hkûn lé, zui saî é muzó mai dingmán é sù gâ é lé wó yû bê a nghut lhú?

²² Haû mù luî, yhâng é lumjínj myit gi, yhâng é muzó eq rahá za e ló é yanmai, lumjínj myit gi, jup byíng lo é lé, nàng wó myâng bê nghut ri. ²³ Haû su mù, "Abraham gi, Garai Gasang lé lumjínj é nghut mù luî, yhang lé dingmán sù ga són byi bê."☆ ga luî, kê tô é Chyúmdang gi, dik to bê. Dum, yhang lé Garai Gasâng é buinùm hpó ga luî le myhíng byi bê. ²⁴ Haû mù luî, byù gi, lumjínj é myit èq baú za a nghut, zui saî é muzó èq mara hkyut san byi huí é lé, nungmoq bûn sê nyi akô.

²⁵ Haû eq rajung za, Rahap gâ é shiwa myhí gi, jowú su nhik lé lhom te yù mù luî, hkyô gó hkat đông nhang kat pyâm é hkûn le, yhang zui saî é muzó mai dingmán é sù gâ é wó yû bê a nghut lhú? ²⁶ Haû su mù, gungdu má woi-nyí a bo le gi, shi é eq rajung za, haû lumjínj myit má muzó jizó a bo le gi, shî gû nghut bê nghut ri.

3

Mhé Wuî É Shô

¹ Ngá é gumang wuî ê, byù myo myo sará hkâkut nau kó. Hkâsu mù gâ le, ngamoq sê é eq rajung za, sará pé gi, je riyhang htan é đông jéyáng doqdân é hui zo râ nghut lhê.

² Nga-nhúng banshoq bang gi, hkyô myo myo má myit lingbat é bang chyat nghut ri. Byù rayuq yuq dâng èq a lingbat é nghut le gi, yhang gi, jup byíng sù eq yhumsing é gùng lé wó hkang é sù nghut ri.

³ Nga-nhúng myang lé nhutkyáng kyáng byi jáng, myang hau é gungdu gón lé, nga-nhúng ô nau é đông

☆ 2:23 Apûn 15:6

wó cháng nhang lhê. ⁴ Haû mai gotû, wuì-sanghpo pé lé wú wú keq, haû-í kô é sanghpo lé htan é laidún èq mut é hui kôlhang, sanghpo hkâng sù gi, gyai tiq é sanghpo shap èq za, yhâng ô nau é dông, haû pé lé wó hkang yu ri. ⁵ Haû eq rajung za, shô gi, tiq é gungsho za nghut kôlhang, gyai gumrông nghutbûn nyi ri; wú keq, tiq dik é myizik zo gi, yoso mhanpúng mó lé wó nyé gyó nhang ri-nhung. ⁶ Shô haû gi, myi eq wuí nyi ri. Nga-nhûng é gungsho má, shô haû gi, agè ashop é mingkan dut lò mù, nga-nhûng é gungsho asak lé achayut dut nhâng luí, gungsho asak lé nyhê tuq kat ri. Haû gi, ngaraî myî èq nyhê tuq kat é nghut bê.

⁷ Dusak ajung jung, nghoq ahú hú, myì má yê é jung eq wuì hkaû má nyi jung banshoq gi, wó mhê yu é jung chyat nghut mù, byu pé gi, haû pé lé mhê yu nyi akô. ⁸ Nghut kôlhang, shô lé kúm gi, byù ó le a wó mhê yù kó nghut ri. Haû gi, apyî abat, agè ashop, uphkâng a wó é eq, shi é jung duq èq byíng tô é jung nghut nyi ri.

⁹ Nga-nhúng gi, shô hau èq nga-nhûng é Yhumsîng eq Îwa Garai lé hkya-on nyi lhê; hau èq za, Garai Gasâng é gunglhô dông hpan tô é waxâng zo wuí lé le nhîng pyâm nyi ri. ¹⁰ Nhut ralhum za mai, hkya-ôn é dang eq nhîng é dang htoq lo ri. Ngá é gumang wuì ê, haû su kut é gi, a gè. ¹¹ Wuìbúm radong za mai, chuî nghâm é wuì eq hkô é wuì wó htoq râ lhu? ¹² Ngá gumang wuì ê, maihpáng gâm mai tsanlun shi, tsibiyiq nuî mai maihpáng shi, wó zui râ lhu? Haû eq rajung za, xô ngam é wuì gi, chuî nghâm é wuì lé wó lhoq htoq byi râ a nghut.

Ahtoq Mai Lo É Hpaqchyî

¹³ Nungmoq má, hpaqchyî byéng-yá bo é sù eq sê é dat é sù, ó nghut lhê lhu? Haû yuq gi, yhang hpaqchyî bo é hkyô lé, hpaqchyî mai wó yu é, myit lhoq nyhum é hkyo èq,

yhumsîng zui saî é ge é muzó dông tân shit nyî sháng gaq.
¹⁴ Nghut kôlhang, nungmoq é myit má ladu laî é manon é i-myit eq, lú lhum bat zik é i-myit bo é nghut le gi, hkâ-nghutbun kó, haû tengmán hkyô lé le hkâ-mhaû pyám kó.
¹⁵ Haû sù é hpaqchyî byéng-yá kúm gi, mauhkûng htoq mai gyó lo é hpaqchyî byéng-yá a nghut, haû gi, myigùng htoq mâ é, gungsho ô nau é eq, nat é hpaqchyî byéng-yá chyat nghut nyi ri. ¹⁶ Hkâsu mù gâ le, manon é eq lú lhum bat zik é dut nyi le gi, ruk ruk rak rak é hkyô eq agè ashop é mù ajung jung jup hkûm nyi ri.

¹⁷ Mauhkûng htoq mâ é hpaqchyî byéng-yá kúm gi, sâng-hi awang má sansêng nyi ri; hau htâng má gi, nguingón hkyô lé ô nau é, myit nûm é, jìno gyô é, shogyo nhikmyin sê é eq ge é ashi zuî nyi mù luî, gamhkui a bò, ahpuq alik a dut é eq, kut mhaú a sê é hpaqchyî byéng-yá nghut nyi ri. ¹⁸ Hau htoq agó, nguingón é hkyô dat sô xoq é bang gi, nguingón é shijí lé sân kat é bang nghut mù, ge é ashi wó yû kó râ nghut lhê.

4

Yhumsing Gùng Lé, Garai Gasâng Chyáng Ap To Râ Hkyô

¹ Nungmoq má gyè dut lhûm é eq mabyoq jishûm gi, hkâmai htoq lo é lhú? Nungmoq ahkaû má gungsho ô nau é hkyô pé ngón hkyô hô mù, majan zân lhûm é yanmai, dut htoq lo é a nghut kó lhú? ² Nungmoq yut yut myit ô nau nyi kôlhang, haî le a wó yû kó. Nungmoq sat nyi é eq manon nyi kôlhang, a wó yû kó. Nungmoq byoq lhûm nyi é eq majan htoq lhûm nyi kôlhang, haî le a wó yû kó; hkâsu mù gâ le, nungmoq, Garai Gasang lé a dung kô é yanmai nghut ri. ³ Nungmoq dung kôlhang, a myang yù kó nghut ri; hkâsu mù gâ le, nungmoq é ngón kún hkyô má jai chûng langsâ pyám râ matú, shut é dông dúng nyi kô é yanmai nghut ri.

⁴ Su-myi sulàng lú é bang su gidìq a gîng é bang ê, mingkan ô nau é hkyô lé buinùm du é myit gi, Garai lé a ngui é myit nghut é hkyô lé, nungmoq a sé kó lú? Haû mù luí, mingkan ô nau é hkyô eq buinùm dù naù sù ó nghut kôlhang, Garai Gasâng é gyè nghut nyi ri. ⁵ Dum ralhum, nga-nhúng má Garai Gasang kat lhùng tô é woi-nyí gi, manon é myit lúng nyi ri ga luí, Chyúmdang má taí é gi, akôm nghut ri nghû, nungmoq myit ngam nyi akô lú? ⁶ Nghut kôlhang, Yhang gi, je kô é jeju ru byî nyi lhê. Haû eq rajung za, Chyúmdang má,
"Garai Gasang gi, nghutbùn é bang lé hkûm zing pyám kôlhang, myit lhoq nyhum é bang lé jeju byî ri."☆
ga taí tô ri.

⁷ Haû mù, Garai uphkan é a-ô má ru nyi nyí keq; Nat Tsadán lé hkûm tang pyám keq; haú hkûn, yhang nungmoq chyáng mai hpanq byuq râ nghut lhê. ⁸ Garai Gasâng chyáng huí ê keq, haú hkûn, Yhang, nungmoq chyáng huí lé lô râ nghut lhê. Yubak kut é bang ê, nungmoq é loq pé lé chí san chí sêng pyám keq. Myit koq xân é bang ê, nungmoq é myit nhiklhum lé lhoq chyoi lhoq yúng to keq. Yudaq htûng đông loq lé chí san chí sêng pyám keq gâ é lichyúm gi, i-myt, gungdu lé lhoq san lhoq sêng pyâm é lé gâ lhê. ⁹ Nungmoq gi, myit yón é, iyon yôn é eq ngaubyi ngau-nhap é kut nyí keq. Nungmoq é wuihâ é hkyô lé gi, iyon đông, nungmoq é gabú é hkyô lé gi, yón kuq é đông htaí pyám keq. ¹⁰ Haû Yhumsîng Garaí é hí má i-myt lhoq nyhum nyí keq, haú hkûn, Yhang gi, nungmoq lé lhoq toq râ nghut lhê.

¹¹ Gumang wuì ê, nungmoq yhangchang a ge é đông hkâtaí hpoí lhum kó. Yhumsîng é yhanggu yhangmang lé a ge é đông taí hpoí nyi é sù, haû a nghut jáng, jéyáng é sù gi, haû tarâ lé a ge é đông taí hpoí nyi mù luí, jéyáng

☆ 4:6 Sânghkyang 3:34

é sù nghut nyi ri. Haû tarâ lé nàng jéyáng nyi é nghut le gi, tarâ lé châng é sù a nghut é za, tarâ jéyáng sù nàng dut nyi ri. ¹² Garai Gasang za tarâ byî tô é eq tarâ dara sù, wó hkyi yu é sù eq, wó lhoq htên é sù nghut nyi lhê. Hau é yanmai, náng é yhumkyo hpó lé jéyáng é sù nàng gi, ó yuq wa nghut lhê lú?

Gyáng Dang A Taí Râ Hkyô

¹³ "Ngamoq, hkû-nyí napmá ra-nyí nyí, wà rawà wà shut ê mù, haû má razàn kô ê nyí luí, hpugá wuiloq gá mù amyat wó myang yù râ." ga taí nyi é bang ê, gyô wú keq. ¹⁴ Napmá haí dut lô râ lé lhang, nungmoq gi, a sé ko. Nungmoq é asak gi, haí nghut nyi lhê lú? Haû gi, razup rahtâng za htoq shit luí dum byuq byuq ló mù é, nghansoq eq rajung za nghut nyi ri. ¹⁵ Haû mù luí, nungmoq haû su ga taí nyí râ malaí gi, "Yhumsîng Garai dông é nghut le gi, ngamoq le ru wó dui nyí mù, shî le, mhô le, wó kut râ nghut lhê." nghû luí, wó taí râ nghut lhê. ¹⁶ Ahkuí kúm gi, nungmoq é gyáng é dang dông gumrong nyi akô; haû su gumrong é hkyô banshoq gi, agè ashop é jung chyat nghut nyi ri. ¹⁷ Haû mù luí, ge é mû sê kut to luí, a kut é sù gi, mara kut sù dut bê nghut ri.

5

Sùt Wó Bang Lé Sidiq Byî É Dang

¹ Sùt wó é bang ê, gyo keq, nungmoq chyáng jé lé lô râ é wuîhke jamjau hkyo é yanmai, ngau garû nyí keq. ² Nungmoq é sutzè gi, htên bup byuq bê nghut ri; nungmoq é wutbu wutmè le manot èq zô pyám bê nghut ri. ³ Nungmoq é hîng eq ngùn má lhang, jogyik zuí byuq mù luí, haû jogyik gi, nungmoq é mara hkyam shut saksé dut byî é eq, nungmoq é gungsho lé myi su zô pyám râ nghut lhê. Nungmoq gi, jihtûm buinyí shí pé má, sutzè lé

za hkong to bekô nhung! ⁴ Wú keq, nungmoq é yohtung dùng yò yam nhâng mù luî, ahpau a byî é za, nungmoq mhaú zô tô é ahpau pé garû nyi é htê pé eq, mô zui bang garû é htê pé lé gi, haú a-tsam dik shoq bo é Garai wó gyo byi bê nghut ri. ⁵ Nungmoq gi, myigùng htoq má hkik hkik hkâm hkâm wó nyi é eq, i-myt ô nau é đông ngón hkyô chyat châng nyi bum akô. Nungmoq gi, sat râ buinyi matú yhumsing é gùng lé tsô myum to bekô nghut ri. ⁶ Haú dingmán é sù* lé, nungmoq mara hân mù, sat pyám bekô. Yhang kúm gi, nungmoq lé a lhom hkâm zìng nghut ri.

Myit Hing Hing Hkam Jan Ra Râ Hkyô

⁷ Haú mù luî, gumang wuî ê, haú Yhumsing dum jé lé é buinyi jé shoq myit hing é èq lánng nyî keq ô! Hkyâm saí sù lé wú wú keq, yhang gi, myìhpún mai ahpau dán é ashi lé wó yû shoq ga mau mún eq wò htáng htâng é mau wo gyûn é jé shoq myit hing hing lánng nyi ri. ⁸ Haú eq rajung za, nungmoq le, Yhumsing Yesuq dum jé lé râ gi, chyâng lo nyi bê nghut é yanmai, myit hing é èq, i-myt lé lhoq ging lhoq tìng to keq. ⁹ Gumang wuî ê, nungmoq jéyáng a hui sháng gaq, nungmoq yhangchang hkâ-nyung nyâng lhûm nyi ko. Wú keq, Tarâ agyî gi, hkúmdong má jé nyi to bê nghut ri.

¹⁰ Gumang wuî ê, haú Yhumsing Garaî é myìng eq hko kyô é myiqhtoî pé wuìhke jamjau huî é hkûn, jân pyâm é myit lé, nungmoq gi, ge é alik agàn kut yû keq. ¹¹ Wú keq, shikut shirang é bang lé, nga-nhúng gi, hkungsô wó é bang nghu é nghut lhê. Yobaq hkâm jân é yanmai, Yhumsing Garai gi, yhang lé htâng má myo myo dum shimân byî é hkyô lé, nungmoq wó gyô wú bê nghut

* 5:6 Dingmán é sù gâ é danghkun lé, Chyúmlaika ra-am má gi, dingmán é bang gâ ri.

lhê. Haî mù gâ le, haû Yhumsîng Garai gi, gyai shogyo nhikmyîn é sù nghut nyi ri.

¹² Ngá é gumang wuî ê, banshoq má ahkyak dik é gi, haî le le hkâdakâm kó. Mauhkûng lé a nghut jáng, myigùng lé lang luî le hkâdakâm kó. Dakam é dang gotû lé le hkâtaî nyi kó. Nungmoq doqđân é a hui sháng gaq, nungmoq gi, nghut é le gi, "nghut lhê", a nghut é le gi, "a nghut", nghû za, taí keq.

Lumjîng Myit Eq Kyûdung Râ Hkyô

¹³ Nungmoq má rayuq yuq wuîhke jamjau huî é nghut le gi, kyûdung nyi sháng gaq; rayuq yuq myit ngón nyi é nghut le gi, hkyá-on mahkôn hkôn nyi sháng gaq.

¹⁴ Nungmoq má rayuq yuq nõhpyo huî é nghut le gi, noqkuq hpúng mâ é nhik bô suwún wuî lé ji yù mù, haú bang gi, Yhumsîng Yesuq é myìng mai yhang lé xû but byi luî, kyûdung byi kó sháng gaq. ¹⁵ Haû su mù, lumjîng myit èq kyûdung é dang gi, haû nõ sù lé lhoq gê luî, Yhumsîng Garai gi, haú yuq lé lhoq toq yû râ nghut lhê. Yhang gi, yubak mara kut shut é nghut kôlhang, hkyut pyám byî é hui râ nghut lhê. ¹⁶ Haû mù luî, nungmoq lhoq ge é hui kó sháng gaq, nungmoq é yubak mara lé rayuq eq rayuq yín lhum mù, kyûdung byî lhûm nyi keq. Dingmán su é kyûdung dang gi, wó dut nhâng râ a-tsam wum-o myo myo bo nyi ri.

¹⁷ Eliyaq gi, nga-nhúng su i-myt unghkaû bo é xângzo byù za nghut lhê. Nghut kôlhang, yhang gi, mau a wò sháng gaq ga, wum kat o kat kyûdung jáng, sùm zan eq lhamó hkyuq hkyap tup myigùng htoq má mau a wò shoq dut byuq é nghut lhê. ¹⁸ Kyû dum dúng kat jáng, mauhkûng gi, mau wo hkyô kat byi mù, myigùng gi, yhâng é kyô shi mui shi lé lhoq htoq byî wú bê nghut lhê.

¹⁹ Ngá é gumang wuì ê, nungmoq chyáng mâ é rayuq yuq, haû tengmán hkyô mai nghoq ló byuq é hkûn, rayuq yuq gi, yhang lé tengmán hkyô shut dum wó shuí taû lo é nghut le kúm gi, ²⁰ haû shuí taû yù sù gi, yubak mara kut é sù lé, shut shai é hkyô mai tengmán hkyô shut shuí taû yù mù, myit woi-nyí lé shi é mai hkyi yù bê nghut é yanmai, yubak mara myo myo lé shuí nghop pyám byî é sù dut berâ lé, bûn nyì keq ô!

Chyoiyúng chyumlaiká: dangshikaq asik; Zaiwa New Testament in Zaiwa

copyright © 2009 Wycliffe Bible Translators, Inc.

Language: Zaiwa

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9781921445408

The New Testament

in Zaiwa

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

Updates
eBible.org

PDF generated using Haiola and XeLaTeX on 17 Nov 2018 from source files dated 20 Jan 2018

23f9fc55-a8a4-59ef-9513-707ec336b0ee